

Van Wyk, J H – Homo Dei: 'n Prinsipiële besinning oor enkele mensbeskouings waaronder dié van Calvin

Potchefstroom: In die Skriflig. Tydskrif van die Gereformeerde Teologiese Vereniging. Jaargang 27. Supplementum 1. 1993. 112 Bladsye. Prys 35.00

Resensent: Prof I W C van Wyk

Ek het met groot dankbaarheid van hierdie nuwe publikasie van prof Amie van Wyk kennis geneem. 'n Mens is dankbaar vir hierdie antropologie in Afrikaans. Dit vul 'n baie groot leemte in ons teologie. Ek gaan dit beslis as 'n voorgeskrewe (of minstens as 'n aanbevole boek) gebruik.

Soos die titel ook aandui, handel 'n groot gedeelte van die boek oor die antropologie van Calvin. Daar word gehandel oor die oorsprong van die mens, die wese van die mens, die roeping van die mens en die bestemming van die mens by Calvin. In 'n volgende hoofstuk behandel Van Wyk die piëtistiese mensbeskouing. In hierdie hoofstuk word daar gehandel oor onder andere Andrew Murray en die kapelaansdiens. In die vierde hoofstuk word die apartheidsmensbeskouing behandel. Hier word onder andere gekyk na die antropologiese perspektiewe van J D du Toit en H G Stoker.

Die sinodale besluite van die Gereformeerde Kerke oor apartheid word ook krities bespreek. Die vyfde hoofstuk handel oor die rewolusionêre mensbeskouing. C S Banana, A Boesak en die feministiese antropologie word krities bekyk. In die sesde hoofstuk kom die Afrika-mensbeskouing aan die orde. In die sewende en laaste hoofstuk gee Van Wyk enkele perspektiewe oor menswees.

Die waarde van hierdie boekie lê daarin, dat onderwerpe hier uiteindelik bespreek word wat al lankal bespreek moes gewees het, soos die antropologie van die kapelaansdiens. Talle van ons het al lankal die gevoel gehad dat alles nie dáár teologies in orde is nie. Al is dit eintlik te laat, hoop ons dat hierdie boekie 'n debat aan die gang sal sit, wat hopelik tot positiewe veranderinge in die kapelaansdiens sal lei.

Hierdie werk is nie 'n lywige boek nie (32 bladsye), maar tog is die inhoud gekonsentreerd en moet elke sin aandagtig gelees word. Die hoofstukke vorm sterk selfstandige eenhede, maar die opbou en organisasie geskied logies samehangend. Deurgaans verbind die outeur sy uitgangspunt, naamlik dat die tema 'n etiese kwessie is, in die werk tot 'n eenheid.

Daar is 'n bibliografie wat toon dat die outeur intensief gelees het. Sy bronhantering is ook baie goed en funksioneel gedoen.

Van der Walt, B J – Godsdienverskeidenheid, -gelykheid en -vryheid in Suid Afrika

Potchefstroom: Instituut vir Reformatoriese Studie. 42 Bladsye. Prys onbekend

Resensent: Ds J P J Wagenaar

Hierdie publikasie is 'n gepubliseerde lesing van die skrywer wat gelewer is tydens die 'eerste kongres van die Suid-Afrikaanse Akademie vir Godsdien', Pretoria, 17-19 Januarie 1994. Die werklike tema wat die skrywer aan die orde stel, word as subhoof van die publikasie soos volg geformuleer: Wat is die implikasies vir Christelike Hoër Onderwys.

In die publikasies word dit spoedig duidelik dat die skrywer in werklikheid hierdie onderwerp hanteer weens die besorgdheid oor wat die gevolge van die nuwe grondwet in Suid-Afrika kan wees vir die Potchefstroomse Universiteit vir Christelike Hoër Onderwys.

In die nuwe grondwetlike bestel van Suid-Afrika is hierdie vraagstuk baie aktueel, nie alleen vir die genoemde

universiteit nie, maar vir elke opvoedkundige instelling waar Christelike waardes en beginsels gehandhaaf word en selfs statutêr verskans is. Die belangrikste gebrek van die publikasie is egter dat dit 'n gepubliseerde lesing is. 'n Lesing veronderstel immers 'n bepaalde verwysingsraamwerk by die toehoorders. Daarom sal daar by die lees van die brosjure steeds baie onbeantwoorde vrae bly vir die gewone belangstellende leser.

Die skrywer wys daarop dat godsdien in hierdie post-modernistiese wêreld met 'n eenaardige verskynsel te doen het. Enersyds beleef ons 'n groot-skaalse oplewing van religieuse bewustheid. In sy beskrywing van hoe religie op pad terug is in die komtemporêre Westerse wêreld, is dit sy mening dat daar tussen ses tipes godsdienste onderskei kan word:

- Wêreldgodsdienste, soos Islam, Boedhisme en Hindoeïsme;
- Aangepaste oosterse religieë en kultusse soos Hare Krishna;
- Die New-Age bewegings;
- Neo-paganistiese religieë soos die ou Keltiese en Germaanse heidendom;
- Implisiete godsdienste waarmee bedoel word dat bepaalde lewensfasette soos sukses, rykdom, of individualiteit verabsoluteer word; en